

В СРЕДУ ВАИЙ ВЕЧЕРА

Обычное стихословие. На Господи воззвах, поставим стихов 10. и поем
настоящий самогласен дне дважды. Глас 5:

Богатый в страстех сый, * прелестною лицемерия обложен есмь одеждою, * веселяся в злых невоздержания, * и безмерное немилосердие показую, * презирая мой ум, * пред дверьми поверженный покаяния, * алчущий всякаго блага, и болящий невниманием моим: * но Ты Господи Лазаря мя сотвори, * нищаго грехами, да не како требуяй, * не получу перста орошающа, * болезнующу моему языку в негасимом огни: * в недрах же патриарха Авраама всели мене, * яко Человеколюбец.

Мученичен: Несытною любовию души Христа * не отвергостесе святии мученицы, * иже различныя раны страстей претерпевше, * мучителей дерзость низложисте: * непреклонну и невредиму веру сохранше, * на небеса преставистесе. * Темже и дерзновение получивше к Нему, * просите даровати нам велию милость.

Ины стихиры господина Иосифа. Глас 5.

Подобен: Радуйся постником:

Об ону страну Иордана плотию ходя Иисусе, * с Тобою сущим вопил еси: * друг Лазарь уже умре, * и погребению ныне предадеша. * Темже радуюся друзи Мои вас ради, * да весте, яко вся вем, * Бог сый непреложный, аще и являюся видимый Человек. * Идем убо оживити его, * яко да смерть оцтит сего победу, * и совершенное разрушение, яже е сотворю, * подая мирови велию милость.

Марфу и Марию вернии подражающе, * ко Господу послем божественная деяния яко молитвы, * яко да пришед наш ум воскресит, * мертв лежащий люте во гробе лености нечувственный, * страха Божественнаго никакоже ощущающий, * и действ животных ныне не имущий, зовуще: * виждь Господи, и якоже друга Твоего Лазаря древле Щедре, * предстанием воздвигл еси страшным, * сице всех оживи, * подаяй велию милость.

Ина стихира господина Феодора, глас 6.

Подобен: Господи на гроб:

Двоеденствует Лазарь во гробе, * сущия от века видит умерших, * тамо зрит страхи странная, * множество неисчетное адовыми держимое узами: * темже сродницы рыдают горько, * предвидяще гроб его. * Христос же идет оживити друга Своего, * едино от всех совершити согласие: * благословен еси Спасе, помилуй нас.

И в Минее 4.

Прокимен, псалом 114. Глас 4: Благоугожду пред Господем во стране живых.

Стих: Возлюбих, яко услышит Господь глас моления моего.

Бытия чтение. [Глава 43, ст. 26 – 31, глава 45, ст. 1 – 16.]

Принесоша Иосифу братия его дары, яже имяху в руках своих, в дом: и поклонишася ему лицом до земли. И вопроши их: здрави ли есте? и рече им: здрав

ли есть отец ваш старец, егоже рекосте, еще ли жив есть? Они же рекоша: здрав есть раб твой отец наш, еще жив есть. и рече: благословен человек оный Богу. и прикише поклонишася ему. Воззрев же очима своима Иосиф, виде Вениамина брата своего единоматерня, и рече: сей ли есть брат ваш юнейший, егоже рекосте ко мне привести? и рече: Бог да помилует тя чадо. Возмутися же Иосиф, подвижеся бо утроба его о брате своем, и искаше плакати: вшед же в ложницу, плакася тамо. И умыв лице, изшед удержася. И не можаше Иосиф удержатися всем предстоящим ему, но рече: отослите всех от мене: и не предстояше ни един Иосифу, егда познавашеся братии своей. И испусти глас с плачем: слышаша же вси египтяне, и слышано бысть в дому фараонове. Рече же Иосиф братии своей: аз есмь Иосиф: еще ли отец мой жив есть? и не могоша братия отвещати ему: смутишася бо. Рече же Иосиф братии своей: приблизитесь ко мне, и приближишася. и рече: аз есмь Иосиф брат ваш, егоже продасте во Египет. Ныне убо не скорбите, ниже жестоко вам да явится, яко продасте мя семо: на жизнь бо посла мя Бог пред вами. Сие бо второе лето глад на земли, и еще пять лет оста, в нихже не будет оранья, ни жатвы. Посла бо мя Бог пред вами оставити вам останок на земли, и препитати ваш останок велий. Ныне убо не вы посласте мя семо, но Бог: и сотвори мя яко отца фараону, и господина всему дому его, и князя всей земли Египетстей. Потщавшеся убо, взыдите ко отцу моему, и рцыте ему: сия глаголет сын твой Иосиф: сотвори мя Бог господина всей земли Египетстей: сниди убо ко мне, и не умедли. И вселишися в земли Гесемли Аравийстей, и будеши близ мене ты, и сынове твои, и сынове сынов твоих, овцы твоя, и волове твои, и елика суть твоя: И препитаю тя тамо, еще бо пять лет будет глад на земли, да не погибнеша ты, и сынове твои, и вся имения твоя. Се очи ваши видят, и очи Вениамина брата моего, яко уста моя глаголющая к вам. Возвестите убо отцу моему всю славу мою сущую во Египте, и елика видите: и ускоривше, приведите отца моего семо. И напад на выю Вениамина брата своего, плакася над ним: и Вениамин плакася на выи его. И облобызав всю братию свою, плакася над ними: и по сих глаголаша к нему братия его. И пронесеся глас в дому фараонове, глаголюще: приидоша братия Иосифова: возрадовася же фараон, и раби его.

Прокимен, псалом 115, глас 4: Молитвы моя Господеви воздам пред всеми людьми Его.

Стих: В веровах, темже возглаголах, аз же смирихся зело.

Притчей чтение. [Глава 21, ст. 23 – 31, глава 22, ст. 1 – 4.]

Иже хранит своя уста и язык, соблюдает от печали душу свою. Продерзый, и величавый, и горделивый, губитель нарицается: а иже памятозлобствует, беззаконен. Похоти лениваго убивают: не произволяют бо руце его творити что. Нечестивый желает весь день похоти злыя, праведный же милует и щедрит нещадно. Жертвы нечестивых мерзость Господеви: небо беззаконно приносят я. Свидетель ложный погибнет, муж же послушлив сохраняемь возглаголет. Нечестив муж безстыдно стоит лицом: правый же сам разумевае пути своя. Несть премудрости, несть мужества, несть совета у нечестиваго. Конь уготовляется на день брани: от Господа же помощь. Лучше имя доброе, неже богатство много, паче же сребра и злата благодать благая. Богат и нищ сретоста друг друга: обоих же Господь сотвори. Худог видево лукаваго мучима крепко, сам наказуется:

безумнии же мимошедше отгщетишася. Род премудрости страх Господень, и богатство, и слава, и живот.

И прочее возследование Преждеосвященных.

В ЧЕТВЕРТОК ВАИЙ НА УТРЕНИ ТРОИЧНЫ.

По 1-м стихословии седальны апостольския Осмогласника.

Но 2-м же стихословии глаголем седален, господина Иосифа. Глас 5.

Подобен: Собезначальное:

Видение и деяние, яко сопрягшися, * на Христову мольбу послати потщимся, * умерший наш ум якоже инаго Лазаря, * яко да оживит Своим предстанием страшным, * ветви правды Тому принести, и звати: * благословен Грядый во имя Господне.

Слава, тойже.

И ныне, Богородичен:

Души моя страсти многоболезненныя, * и плоти моя недуги вскоре исцели: * ума моего извращения постави Всенепорочная, * и в тишине помышления, * молитвы приносить чистыя Царю всех сподоби Богородице, * и испросити грехов оставление.

По 3-м стихословии, седален господина Феодора, глас 6.

Подобен: Ангельския:

Двоеденствует днесь Лазарь умерый, и о сем проливают печали слезы сродницы, Мариа с Марфою, камень предвидящи гробный. Предста Зиждитель с Своими ученики, смерть пленити, даруяй живот. Темже вопием Ему: Господи слава Тебе.

Слава, тойже.

И ныне, Богородичен:

Святая Владычице Чистая, * Бога нашего Мати, * всех Творца неизреченно рождающая, * моли со апостолы священными всегда благодать Его, * страстей нас избавити, * и оставление нам дати грехов.

Канон в Минеи: и трипеснец господина Иосифа. И стихословится песнь. Глас 5.

Песнь 4.

Ирмос: Божественное Твое разумев ...,

Зарю вашего утешения, затворенных в сени греховней просветите, благочестно светоноснии вас восхваляющих апостоли.

Любовь с милосердием спрягше, и на умоление Христу вернии послати потщимся, яко да и нас воскресит от гроба тайных страстей наших.

Любве плотския не пощадим, умерщвлени душею, и любовию прилепимся Избавителю, яко да от адова нас избавит страшнаго осуждения.

Прорекл еси Лазарево успение, егоже по мале воздвиг, от ссущих цветоносящих приял еси хвалу, страсти Твоя Спасе мой образы.

Богородичен: Из Тебе Божественная вода истече безсмертия и жизни, Богородительнице Всенепорочная: юже вкушающии, жажды Чистая смертоносныя избавляются.

Иный господина Феодора, глас 6.

Ирмос: Услышах слух Твой, * и убояхся, * разумех дела Твоя, * и ужасохся: * слава силе Твоей Господи.

Погребается Лазарь, и на гробе яже о Марфе ныне рыдают и плачут, предстаети Тебе Животодавцу, желающия.

Смерть начинает трепетати, еже к ней снития Твоего Христе ощущающа: яко жизнь бо, тщетну сию показал еси концем.

Троицен: Единиче простая, несозданная, безначальное Естество, в Троице певаемое Ипостасьми, спаси ны верою покланяющияся державе Твоей.

Богородичен: Из Отца безлетна Сына, в лето Богородительнице, неискусомужно родила еси, странно чудо, пребывши Дева доящи.

Слава Тебе Боже наш, слава Тебе.

Снидитесь, приидите, иже в пустынях и пещерах, срести грядущаго на жребяти, Господа славы в песнех.

Катавасия: Услышах слух Твой, * и убояхся, * разумех дела Твоя, * и ужасохся: * слава силе Твоей Господи.

Песнь 8.

Ирмос: Тебе Вседетелю ...,

Камень тяжкий от сердца моего отъяти, молити Всещедраго, камение явившеся, краеугольнаго камене, богоглаголивии апостоли Господни.

Идем, Твоим провозглашал еси другом, друг Мой Лазарь уже успе: сего воздвизая, усплю смерти всепагубную злобу во веки.

Кротцы душею, и смирени нравом бывше, благодатию примем кроткаго всех грядущаго Владыку, гордыню сокрушити лукаваго.

Богородичен: Дверь Тя света просвещенную видит пророк, Всенепорочная, Светодавца бо раждаеши несказанно, нам уподобившася: Егоже превозносим во вся веки.

Иный.

Ирмос: Преподобнии Твои отроцы * в пещи херувимы подражаху, * трисвятую песнь воспевающе: * благословите, пойте, * и превозносите во вся веки.

Мариа же и Марфа ныне рыдают, во гробе лежаща видяще Лазаря, и болезненно вопиют: аще бы был Христос zde, сродник наш не бы умерл.

А да чае погубитися, ибо Жизнь приходит Лазаря воздвигнути вопиюща: благословите, пойте, и превозносите во вся веки.

Благословим Отца, и Сына, и Святаго Духа, Господа.

Троицен: Безначальным и рождеством же и происхождением, Отцу покланяюся рождшему, Сына прославляю рождшася, воспеваю совозсиявша Отцу же и Сыну, Духа Святаго.

Богородичен: Егоже родила еси Дево несказанно, всегда яко Человеколюбца не престай молящи, да от бед спасет к Тебе прибегающия.

Слава Тебе Боже наш, слава Тебе.

Добродетели яко ветви, и яко ваиа, ко сретению уготовим, и Царю Христу вернии возопием: благословите, пойте, и превозносите во вся веки.

Хвалим, благословим, покланяемся Господеви:

Катавасия: Преподобнии Твои отроцы * в печи херувимы подражаху, * трисвятую песнь воспевающе: * благословите, пойте, * и превозносите во вся веки.

Песнь 9.

Ирмос: Исаие ликуй ...,

Дружбы избави мя льстиваго Владыко Христе, други Твоя мудрыя ученики показавый, с нимиже шед возставил еси друга Твоего вернаго, Спасе Лазаря, благодарно воспевающа Тя.

Исполнением Господи поста, исполни наша сердца же и ум, Благоутробне, радости, апостол Твоих мольбами, чисте возлюбивших Тя, Спасе душ наших.

Смердя гнойми злобы, во гробе живу лености Христе. Темже вопию Ти: воздвигни, спаси мя, яко да и аз с ветвьми добродетелей усрящу Тя, зывая осанна Богу.

Богородичен: Во дву волю и существу родила еси нам Сына Отроковице, едиnorodна Отцу, бывша Человека, да нас покажет общники естества, Пречистая, Божественнейшаго, Пребожественный.

Иный.

Ирмос: Безсеменнаго зачатия Рождество несказанное, * Матере безмужныя нетленен Плод: * Божие бо рождение обновляет естества, * темже Тя вси роди, * яко Богоневестную Матерь, православно величаем.

В гробе Лазарь двоеденствует днесь, и над ним проливаете слезы Мариа же и Марфа, яко сестры родныя: Христос же грядет к нему с божественными апостолами, показати велие чудо.

Смерте всепагубная, приими разрушение, вратницы же твои заклепы да блюдут: ибо глаголом сокрушит твоя врата Христос, Лазаря возставив. Пий первое сие аде пророк тебе вопиет с нами.

Троицен: Единого едиnorodителю, едиnorodнаго Сына Отче: и едине единого свете, света сияние: и единый едине единого Бога, Святыи Душе, Господа Господь, воистинну сый. О Троице Единице Святая, спаси мя богословяща Тя.

Богородичен: Чудо Рождества Твоего удивляет мя Всенепорочная, како зачинаеши безсеменно необыменнаго? рцы, како девствуеши, рождши яко Мати? Еже паче естества верою прием, Рожденному поклонися, елика хочет бо и может.

Слава Тебе Боже наш, слава Тебе.

Господь грядет всести, якоже писано, на жребя: людие готовитесь со страхом прияти Царя всех с ваием, яко победителя смерти, из ада воздвигшаго Лазаря.

Катавасия: Безсеменнаго зачатия Рождество несказанное, * Матере безмужныя нетленен Плод: * Божие бо рождение обновляет естества, * темже Тя вси роди, * яко Богоневестную Матерь, православно величаем.

Светилен гласа.

На стиховне самогласен дне, дважды. Глас 5:

Приидите прежде конца вси братие * чистым сердцем приступим ко благоутробному Богу, * житейская обстояния отринувше, * о душах попечение сотворим, * брашен сластей воздержанием гнушающесе, * о милостыни попецемся: * тою бо, якоже писано есть, прияша нещии учредивше ангелы. * Напитаим убогими, Напитавшаго нас Своею плотию: * облекуем себе во одеющагося светом яко ризою, * да молитвами Пречистыя Богородицы, и Девы Матере, * оставление получивше грехов, * со умилением к Нему возопиим: * Господи, избави нас от шуюго ответа, * и сподоби нас деснаго Твоего предстояния, * яко Милостив и Человеколюбец.

Стих: Исполнихомся заутра милости Твоя Господи, и возрадовахомся, и возвеселихомся: во вся дни наша возвеселихомся, за дни в няже смирил ны еси, лета в няже видехом злая. И призри на рабы Твоя, и на дела Твоя, и настави сыны их.

Приидите прежде конца вси братие * чистым сердцем приступим ко благоутробному Богу, * житейская обстояния отринувше, * о душах попечение сотворим, * брашен сластей воздержанием гнушающесе, * о милостыни попецемся: * тою бо, якоже писано есть, прияша нещии учредивше ангелы. * Напитаим убогими, Напитавшаго нас Своею плотию: * облекуем себе во одеющагося светом яко ризою, * да молитвами Пречистыя Богородицы, и Девы Матере, * оставление получивше грехов, * со умилением к Нему возопиим: * Господи, избави нас от шуюго ответа, * и сподоби нас деснаго Твоего предстояния, * яко Милостив и Человеколюбец.

Таже стих: И буди светлость Господа Бога нашего на нас, и дела рук наших исправи на нас, и дело рук наших исправи.:

Мученичен: В муках суще святии, * веселящесе вопияху: * изменения нам сия суть ко Владыце: * вместо настоящих ран телесных светлое одеяние * в воскресение процветет нам, * вместо безчестия венцы, * вместо уз темничных рай, и вместо осуждения со злодеи, * со ангелы житие. * Темже молитвами их Господи, * спаси души наша.

Слава, и ныне, Богородичен.

Подобен: Благодатная:

Предызбранная от всех родов услыши глас наш, * и даруй прошения душ наших, * избавление страстей * и болезней апостол ради, * вся могущая яко Мати Божия.

НА 6-М ЧАСЕ

Тропарь Пророчества. Глас 1:

Гласа раб Твоих Господи * не забуди, помяни, * яко всегда упование на Тя * положихом вся могущаго, * и помози нам, молимся.

Прокимен, псалом 117, глас 4: Сия врата Господня, праведнии внидут в ня.

Стих: Исповедайтесь Господеви, яко благ.

Пророчества Исаиина чтение. [Глава 65, ст. 8 – 16.]

Также глаголет Господь: иже образом обретается ягода на грезне, и рекут, не погуби его, яко благословение есть в нем: тако сотворю служащаго Ми ради, не имам всех погубити ради его. И изведу из Иакова семя, и из Иуды, и наследит гору святую Мою, и наследят избранныи Мои, и раби Мои, и вселятся тамо. И будут в дубраве ограды стадом, и юдоль Ахорская в покоище говядов людем Моим, иже взыскаша Мене. Вы же оставившии Мя, и забывающии гору святую Мою, и уготовляющии демону трапезу, и исполняющии щастию растворение: аз предам вас под меч, вси заклятием падете: яко звах вас, и не послушасте: глаголах, и преслушасте, и сотвористе лукавое предо Мною, и яже не хотех, избрасте. Сего ради тако глаголет Господь: се работающии Ми ясти будут, вы же взалчете. се работающии Ми пити будут, вы же возжаждете: се работающии Ми возрадуются, вы же посрамитесь: се работающии Ми возвеселятся в веселии сердца, вы же возопиете в болезни сердца вашего, и от сокрушения духа восплачетесь. Оставьте бо имя ваше в насыщение избранным Моим, вас же избьет Господь. работающим же Мне наречется имя новое, Еже благословится на земли: благословят бо Бога истиннаго.

Прокимен, псалом 118, глас 4: Путь заповедей Твоих текох, егда расширил еси сердце мое.

Стих: Законоположи мне Господи путь оправданий Твоих.